

Lider di Partido RED Sr. Rudy Lampe

Sentencia di hues ta manda un señal pa politico nan eleva nan nivel di debate politico

ORANJESTAD - E caso di ayera mainta cu Ministerio Publico a entama contra Parlamentario Booshi Wever, tabata un caso penal. Un caso cu a cuminsa a rais di un denuncia cu Sr. Rudy Lampe a haci, despues cu e la sinti cu a atacha su bon nomber. Hues na final ta haya comproba cu Parlamentario Wever a haci su mes castigabel na e castigo di “smaat”.

E castigo correspondiente na e acto aki ta 2 siman condicional di prizon y un periodo di prueba di 3 aña. Pa Sr. Rudy Lampe esaki ta un satisfaccion personal cu Husticia a vence. Durante hopi aña Sr. Rudy Lampe ta sinti cu su bon nomber a keda atacha den comunidad.

Cu e sentencia aki, Hues a menciona varios biaha cu Parlamentario Booshi Wever

no tabata tin ningun base, tampoco ningun prueba pa lansa e acusacionnan aki.

Sr. Rudy Lampe cu tabata Parlamentario di Partido RED, a indica cu e acusacionnan lansa den su direccion ta acusacionnan hopi serio.

Ora acusa un persona di a comete e crimen horroroso di pedofiel ta algo sumamente grave. Hues ta haya comproba cu e bon nomber di Lampe a keda atacha. Awe Rudy Lampe ta sinti’e un persona trankil y cu consenshi limpi ya cu e la logra limpia su nomber.

Na mes momento Sr. Rudy Lampe ta haya e sentencia aki positivo pa Aruba. Despues di e sentencia aki tur politico mester tene na cuenta e sentencia paso e



sentencia aki por persigui nan. Por considera e sentencia aki como uno pisa pa e mundo politico na Aruba Unabes cu ta papia di prizon condicional, e ta un sentencia pisa. Lider di

Partido RED ta kere cu un politico den futuro prome cu e lansa acusacion nan falso e mester pensa bon. E mester por tene na cuenta cu e por enfrenta un sentencia similar den corte.

E sentencia aki no ta conta pa un Parlamentario den Parlamento durante un debate cu ta tumando luga. Esaki ta un otro caso cu ta andando ainda. E caso aki ta na Hoge raad unda cu RED ta cuestiona e principio di inmunidad Parlamentario. Ainda ta wardando riba e sentencia final di e caso aki. Den un debate publico esta den media of riba caya, un politico mester tene na cuenta e sentencia aki. “E sentencia

aki lo contribui sigur na hisa e nivel di debate entre politiconan”, na pensamento di Lampe. Ningun politico cu ta na su rason por bay ignora e sentencia aki sin mas.

Si un politico wordo acusa di “smaat” y a keda aproba cu esaki a tuma luga y tin un sentencia mara na dje, politiconan mester tene na cuenta. Sr. Rudy Lampe a indica cu esaki ta un satisfaccion pa su persona tambe, paso ora a cuminsa cu un partido nobo, RED kier a hisa e nivel di debate na Aruba. E sentencia aki ta manda un señal fuerte pa e comunidad politico cu nan mester ta hopi mas serio den debatenan politico.